

VENDIM
Nr.775, datë 14.12.2005

**PËR KOMPETENCAT, PËRBËRJEN, FUNKSIONIMIN DHE MËNYRËN E
MBLEDHJES DHE TË SHPËRBLIMIT TË ANËTARËVE TË KOMISIONIT
SHTETËROR TË MUZEVE**

(Ndryshuar me vendimin nr.200, date 24.3.2010)

(i përditësuar)

Në mbështetje të nenit 100 të Kushtetutës dhe të pikës 2 të nenit 16 të ligjit nr.9386, datë 4.5.2005 “Për muzetë”, me propozimin e Ministrit të Turizmit, Kulturës, Rinisë dhe Sporteve, Këshilli i Ministrave

VENDOSI:

1. Komisioni Shtetëror i Muzeve të kryesohet nga ministri përgjegjës për trashëgiminë kulturore dhe në përbërje të ketë këta anëtarë:

- Drejtorin e Muzeut Historik Kombëtar;*
- Drejtorin e Qendrës Kombëtare të Inventarizimit të Pasurive Kulturore;*
- Dy përfaqësues nga struktura përgjegjëse për trashëgiminë kulturore, pranë Ministrisë së Turizmit, Kulturës, Rinisë dhe Sporteve;*
- Një përfaqësues nga struktura juridike, pranë Ministrisë së Turizmit, Kulturës, Rinisë dhe Sporteve;*
- Një përfaqësues nga Akademia e Shkencave;*
- Një përfaqësues nga Instituti i Arkeologjisë;*
- Një përfaqësues nga Instituti i Antropologjisë Kulturore;*
- Një përfaqësues nga Këshilli Ndërkombëtar i Muzeve (ICOM) në Shqipëri;*
- Një përfaqësues nga Instituti i Monumenteve të Kulturës;*
- Një përfaqësues nga Instituti i Historisë;*
- Një përfaqësues nga fusha e muzeologjisë.*

Përfaqësuesit e institucioneve të sipërpërmendura caktohen me urdhër të Ministrit të Turizmit, Kulturës, Rinisë dhe Sporteve.

2. KSHM-ja ka këto kompetenca:

a) Harton dhe miraton kriteret për marrjen e licencës për zhvillimin e veprimtarisë nga muzetë privatë;

b) Shqyrton, miraton ose refuzon, brenda 60 ditëve, kërkesën e personit, fizik apo juridik, privat për licencimin e një muzeu privat, në mbështetje të kërkesave të parashikuara nga legjislacioni në fuqi, dhe të kriterëve të miratuara nga KSHM-ja. Ministri i Turizmit, Kulturës, Rinisë dhe Sporteve, në mbështetje të vendimit të KSHM-së, licencon ose jo subjektin e interesuar;

c) Harton dhe miraton formularin përkatës dhe specifikimet për zyrtarizimin e muzeve;

ç) Si autoriteti përgjegjës, merr masat e duhura, në rastin e mbylljes së një muzeu publik, për zhvendosjen e fondit muzeor të muzeut, si dhe përcakton institucionet, që do ta administrojnë këtë fond;

d) Përgatit, administron dhe publikon regjistrin e muzeve të njohura zyrtarisht.

3. KSHM-ja thirret nga Ministri i Turizmit, Kulturës, Rinisë dhe Sporteve, i cili përcakton axhendën e mbledhjes. Njoftimi për mbledhje bëhet të paktën 3 ditë përpara datës së zhvillimit të saj.

4. KSHM-ja i zhvillon mbledhjet në prani të shumicës së anëtarëve. Kur nuk sigurohet kjo shumicë, mbledhja e KSHM-së shtyhet, por jo më vonë se një javë nga data e njoftimit të

ri. Në mbledhjet e KSHM-së, mund të marrin pjesë, pa të drejtë vote, edhe specialistë të fushës.

5. KSHM-ja vendos me shumicë votash. Kur numri i votave është i barabartë, kryetari ka të drejtën e vetos.

6. Juristi, anëtar i KSHM-së, është sekretar teknik i këtij komisioni dhe ka për detyrë të administrojë dokumentacionin e punës së KSHM-së, të mbajë procesverbalet e mbledhjeve dhe të zbardhë vendimet e KSHM-së.

7. Anëtarët e komisionit, të cilët nuk punojnë në sistemin e institucioneve shtetërore, të shpërblehen me 5 000 (pesë mijë) lekë, por jo më shumë se për një mbledhje në muaj

8. Pagesa për shpërblimin të përballohet nga buxheti i Ministrisë së Turizmit, Kulturës, Rinisë dhe Sporteve.

9. Ngarkohet Ministria e Turizmit, Kulturës, Rinisë dhe Sporteve për zbatimin e këtij vendimi.

Ky vendim hyn në fuqi pas botimit në Fletoren Zyrtare.

KRYEMINISTRI
Sali Berisha